



## ҚАРАҒАНДЫ мен ҰЛЫТАУҒА – ЖАҢА ПОЙЫЗ

**1 СӘУІРДЕН БАСТАП ҚАРАҒАНДЫ – МАҢҒЫСТАУ БАҒЫТЫНДА ЖАҢА ПОЙЫЗ ІСКЕ ҚОСЫЛДЫ. БҰРЫН БІРНеше пойызға мініп-түсіп, бірінен соң бірін сағаттап күтіп жүріп жететін жұрт енді Маңғыстау мен Қарағанды арасында кедергісіз қатынайтын болды.**



Бұл маршрут батыс аймағы мен Орталық Қазақстанның Қарағандыдан бөлек, Ұлытау облысын да байланыстырады. Маңғыстаулықтар мен ұлытаулықтардың алысын жақындатып, барыс-келісін жандандыра түседі. Еліміздің шеткері облысы мен орталығын жалғап отырған су жаңа пойыз сәуірдің бірінші күні жолға шығып, түбек темір жолының Маңғыстау вокзалына үшінші күні жетті. Түске қарай темір жол вокзалының алды пойызды қарсы алуға жиналғандар мен жаңа жолсапармен аттанғалы тұрған жолаушыларға толды. Түбек темір жолының басшылық құрамы, теміржолшылар, вокзал әкімшілігі, аудан әкімдігі өкілдері және ақсақалдар салтанатты түрде күтіп алды. Пойыз бригадасына,

келген жолаушыларға «қош келдіңіз» айтып, қонақжайлылық танытып бауырсағы мен шұбатын ұсынды. Түбектің Құрметті теміржолшысы Амандық Алдабергенов ақсақал батасын беріп, сәт сапар тіледі. Халық игілігі үшін осындай ізгі іске ұйытқы болып отырғандарға алғысын айтты.

– №079-080 Маңғыстау – Қарағанды, Қарағанды – Маңғыстау пойызы екі бағытта да аптаның тек тақ күндері қатынайды. Билет бағасы «КТЖ» ресми сайты мен кассаларында плацкарт үшін – 14 207 теңге, купе 21 863 теңге. Қарағандыдан кешкі сағат 19:45-те шығып, түбегке бір күннен соң түскі 12:08-де жетеді. Жолдың ұзақтығы – 40 сағат 56 минут. Кері бағытта Маңғыстаудан сағат тілі 14:34 көрсеткенде қозғалып Қарағандыға 07:30 болғанда барады. Жолсапарды ұйымдастырушы – «Ұлытау» жеке компаниясы. Жолаушыларға арналған алты-жеті вагоннан құралған бұл пойыз өңірімізбен Орталық Қазақстанның екі облысын жақындатып отыр. Жолсапар барысында Ұлытау облысының үш ірі станциясы – Жаңаарқа, Жезқазған және Қоскөл ауылы станцияларының үстімен өтеді, – дейді «Батыс» аймақтық жолаушылар тасымалының Маңғыстау телімі бастығы

Мырзабек Сүйінғарин.

Осы бағыттағы пойыздың іске қосылғаны екі арада оқу, емделу, демалу, жұмыс бабы және басқа да мақсатта қатынайтын жолаушыларға жағымды жаңалық болды. Сондай жолаушылардың бірін төркінге аттанып бара жатқан жерінен жолықтырды. Сәтбаев қаласында туып-өсіп, бүгінде маңғыстаулық атанған апамыз енді туған жеріне қиналмай жететініне риза.

– Жезқазғандағы жақындарыма бара жатырмын, тікелей пойыздың қатынайтынын естігенде қуанғанымы сөзбен жеткізе алмаспын. Мен бұл пойызды он жыл күттім. «Қашан мен де жұрт секілді бір пойызбен емін-еркін шай-тамағымды ішіп отырып жетер екенмін?» дейтінмін. Міне, арманым орындалды. Төркінімдегі той-томалаққа, жақындарымды іздеп барар болсам, Астана немесе Қызылорда арқылы, басқа да пойыздарға мініп, жолда түсіп, тағы күтіп, қиналып жүріп жететін едім. Тікелей баратын пойыздың шыққанына қуаныштымын. Енді осы пойыз тоқтап қалмай, жүріп тұрса екен. Біз сияқты тағы қаншама жолаушының жол азабы жеңілдейді, – деді қуанышын жасыра алмай.

Иә, осы жолаушы айтқандай, бұған дейін Маңғыстаудан Қарағанды бағытында тіке жетуге мүмкіндік болмады. Жолаушылар Ақтөбе, Алматы, Астана, Қызылорда арқылы кем дегенде екі пойыз ауыстырып жүріп жететін. Ендеше, халықтың қуанышы ұзағынан болсын деп тілейміз. Жаңа жолсапарға сәттілік!

Шахида ЖҰМАН



## ТРАНСКАСПИЙ БАҒЫТЫ – стратегиялық серіктестік негізі

**ҚАЗАҚСТАН МЕН ҚЫТАЙ ТЕМІР ЖОЛ КӨЛІГІ САЛАСЫНДАҒЫ ҰНТМАҚТАСТЫҚТЫ ОДАН ӘРІ ДАМУЫТ, ТРАНЗИТТІК ЖҮК ТАСЫМАЛЫН ДАМУЫҒА МҮДДЕЛІ. ТАЯУДА ҚЫТАЙДА ӨТКЕН ҚАЗАҚСТАН – ҚЫТАЙ ЖӨНІНДЕГІ КІШІ КОМИТЕТТІҢ 16-ОТЫРЫСЫНДА ЕКІ ЕЛ АРАСЫНДАҒЫ ТЕМІР ЖОЛ ТАСЫМАЛДАРЫНЫҢ ҚАЗІРГІ ЖАҒДАЙЫ МЕН ДАМУ ПЕРСПЕКТИВАЛАРЫ, СОНДАЙ-АҚ ТРАНЗИТТІК ӨЛЕУЕТТІ АРТТЫРУ МӘСЕЛЕЛЕРІ ҚАРАЛДЫ. ТАСЫМАЛ КӨЛЕМІНІҢ ӨСУІНІҢ ОҢ СЕРПІНІ ЖӘНЕ ТЕМІР ЖОЛ ИНФРАҚҰРЫЛЫМЫН ЖАҢҒЫРТУ БОЙЫНША ЖҮРГІЗІЛІП ЖАТҚАН ЖҰМЫСТАР АТАП ӨТІЛДІ.**



Отырыс қорытындысы бойынша транзитті дамыту және тасымал көлемін ұлғайту жөніндегі ұзақ мерзімді бағдарламаны әзірлеу туралы келісімге қол жеткізді. Бағдарлама шекаралық және порттық инфрақұрылымды үйлесімді дамыту, көлік-логистикалық хабарды қалыптастыру және дамыту, сондай-ақ темір жол машина жасау саласындағы ұнтымақтастықты кеңейтуді көздейді. Сонымен қатар тараптар цифрлық шешімдерді енгізуді жалғастыруға келісті.

«МАҢҒЫСТАУ» АҚПАРАТ

Тараптар Транскаспий халықаралық көлік бағытының стратегиялық маңызын атап өтіп, оны одан әрі дамытуға мүдделілігін растады, оның ішінде Ақтау және Құрық порттарының инфрақұрылымын жаңғырту, 2029 жылға қарай контейнерлік транзит көлемін 3000 пойызға дейін жеткізу көзделуде.



## СЕРПІНДІ сенбілік өтті

Голпрох ЖЕМЕНЕЙ

**ҚОҒАМДЫҚ ОРЫНДА ТАЗАЛЫҚ ПЕН ТӘРТІП ОРНАСА, ОРТАҚ КҮШ-ЖІГЕРМЕН БЕЛГІЛЕНГЕН АУМАҚТЫ ТЕЗ АРАДА РЕТКЕ КЕЛТІРУГЕ БОЛАДЫ. 4 СӘУІР КҮНІ МАҢҒЫСТАУ ОБЛЫСЫНДА «ТАЗА ҚАЗАҚСТАН» ЖАЛПЫҰЛТТЫҚ ЭКОЛОГИЯЛЫҚ АКЦИЯСЫ АЯСЫНДА АУҚЫМДЫ СЕНБІЛІК ҰЙЫМДАСТЫРЫЛЫП, ОҒАН 8 000-ҒА ЖУЫҚ ТҰРҒЫН ҚАТЫСТЫ. ІС-ШАРАНЫ МАҢҒЫСТАУ ОБЛЫСТЫҚ ТАБИҒИ РЕСУРСТАР ЖӘНЕ ТАБИҒАТ ПАЙДАЛАНУ ДЫ РЕТТЕУ БАСҚАРМАСЫ ҰЙЫМДАСТЫРДЫ.**



Экологиялық акцияның негізгі мақсаты – қоршаған ортаны қорғау, қала тазалығын сақтау және тұрғындардың экологиялық мәдениетін қалыптастыру.

Сенбілікке Маңғыстау облысы әкімінің орынбасары Аббат Өрісбаев, сондай-ақ мұнай және құрылыс компанияларының қызметкерлері, экоеріктілер мен қала тұрғындары белсенді қатысты.

– Тазалық жұмыстары 15-шағынаудандағы Амфитеатр аумағынан бастап 9-шағынауданда орналасқан «I Love Aktau» шағын сәулет нысанына дейінгі аралықты қамтыды. Теңіз жағалауымен қатар, Қаракөл көлінің маңын қоқыстан тазартты. Серпінді сенбілікке еріктілер жұдырықтай жұмылды. Олардың қатарында Жаңаөзен қаласынан арнайы келген 50-ге жуық экоерікті бар. Қалалық жағалаудағы қалдықтарды сұрыптап, тазалауға Төтенше жағдайлар департаментінің қызметкерлері мен еріктілер өз үлестерін қосты. Сенбілік барысында 600 тоннаға жуық қоқыс жиналып, 95 гектар аумақ тазартылды. Осындай игі істер алдағы уақытта да жалғасын табады, – деді Маңғыстау облыстық табиғи ресурстар және табиғат пайдалануды реттеу басқармасының басшысы Әсел Балманова.

Ұйымдастырушылар сенбілікке қатысқан белсенді ұжымдарға, еріктілерге және кішкентай экожаныштықтарға тәттілер мен жеміс-жидектерге толы себеттер табысты.